

Ymateb i Ymgynghoriad / Consultation Response

Enw / Name:	Owen Evans
Rôl / Role:	Prif Arolygydd Ei Fawrhydi dros Addysg a Hyfforddiant yng Nghymru
E-bost / Email:	Prif-arolygydd@estyn.llyw.cymru
Rhif Ffôn / Tel No:	029 2044 6446
Dyddiad / Date:	22.04.25
Pwnc / Subject:	Strategaeth y Gymraeg 2025–2030 Crynodeb Ddrafft

Gwybodaeth gefndir am Estyn

Estyn yw Swyddfa Arolygiaeth Ei Fawrhydi dros Addysg a Hyfforddiant yng Nghymru. Fel corff y Goron, mae rydym yn annibynnol ar Lywodraeth Cymru.

Ein prif nod yw codi safonau a gwella ansawdd addysg a hyfforddiant yng Nghymru. Caiff hyn ei nodi yn Neddf Dysgu a Sgiliau 2000¹ a Deddf Addysg 2005 yn bennaf. Wrth gyflawni ei swyddogaethau, mae'n rhaid i ni ystyried:

- Ansawdd addysg a hyfforddiant yng Nghymru;
- Y graddau y mae addysg a hyfforddiant yn bodloni anghenion dysgwyr;
- Y safonau addysgol a gyflawnir gan y rhai sy'n cael addysg a hyfforddiant yng Nghymru;
- Ansawdd arweinyddiaeth a rheolaeth y darparwyr addysg a hyfforddiant hynny, gan gynnwys p'un a yw'r adnoddau ariannol sydd ar gael i'r rhai sy'n darparu addysg a hyfforddiant yn cael eu rheoli'n effeithlon a'u defnyddio mewn modd sy'n cynnig gwerth am arian;
- Datblygiad ysbrydol, moesol, cymdeithasol a diwylliannol dysgwyr; a'r
- Cyfraniad a wneir at les dysgwyr.

Mae ein cylch gwaith yn cynnwys (ond nid yn unig) meithrinfeydd a lleoliadau nas cynhelir, ysgolion cynradd, uwchradd, arbennig a phob oed, ysgolion annibynnol, unedau cyfeirio disgyblion, addysg bellach, dysgu oedolion yn y gymuned, gwasanaethau addysg llywodraeth leol, dysgu yn y gwaith, a hyfforddiant cychwynnol athrawon.

¹ Caiff y ddeddf hon ei disodli gan Ddeddf Addysg Drydyddol ac Ymchwil (Cymru) 2022, pan fydd y darpariaethau ansawdd yn dechrau.

Gallwn roi cyngor i'r Senedd Cymru ar unrhyw fater sy'n gysylltiedig ag addysg a hyfforddiant yng Nghymru. Er mwyn cyflawni rhagoriaeth i ddysgwyr, rydym wedi pennu tri amcan strategol:

- Darparu atebolrwydd i ddefnyddwyr gwasanaeth ar ansawdd a safonau addysg a hyfforddiant yng Nghymru;
- Llywio datblygiad polisi cenedlaethol gan Lywodraeth Cymru;
- Meithrin gallu i wella'r system addysg a hyfforddiant yng Nghymru.

Nid yw'r ymateb hwn yn gyfrinachol.

Ymateb

Cyflwyniad

Mae Estyn yn croesawu crynodeb ddrafft 'Strategaeth y Gymraeg 2025-2030' Cymwysterau Cymru. Mae'n cyd-fynd gyda 'Cymraeg 2050', 'Bil y Gymraeg ac Addysg' (Cymru), a disgygliadau 'Safonau'r Gymraeg'. Mae'r strategaeth wedi'i strwythuro'n glir ac yn darparu cynllun ymarferol ond uchelgeisiol ar draws meysydd allweddol gan gynnwys adolygu a diwygio cymwysterau, rheoleiddio a monitro, diwylliant sefydliadol, a rôl technoleg ac ymchwil.

Rydym yn croesawu'n arbennig y gydnabyddiaeth o'r angen i ehangu cymwysterau cyfrwng Cymraeg a dwyieithog i gefnogi dysgwyr ar y continwmm llawn o sgiliau Cymraeg, gan gynnwys y rhai mewn lleoliadau cyfrwng Saesneg. Bydd hyn yn debygol o helpu i sicrhau mynediad cyfartal i gymwysterau a chanlyniadau gwell i ddysgwyr.

Rydym yn cefnogi'r fframwaith pum colofn allweddol i gynnal y gwaith, yn enwedig y ffordd ymarferol o weithredu a gwerthuso. Fodd bynnag, bydd yn hanfodol sicrhau cysondeb ac eglurder yn y ffordd y mae'r strategaeth wedi'i hymgorffori ar draws y system addysg, yn enwedig yn y sector ôl-16 ac ymhlith y cyrff dyfarnu.

Prif negeseuon

- Rydym yn cefnogi nod a strwythur cyffredinol y strategaeth a'r ffordd mae'n plethu gyda'r polisiau cenedlaethol.
- Rydym yn croesawu'r ffocws ar adolygu a diwygio cymwysterau yn enwedig i ymateb yn rhagweithiol i'r galw cynyddol am ystod briodol o gymwysterau Cymraeg i gefnogi dysgwyr wrth iddyn nhw symud ymlaen ar hyd y continwmm o sgiliau Cymraeg. Mae ehangu'r arlwy sydd ar gael trwy gyfrwng y Gymraeg, yn enwedig o fewn sectorau ôl-16 a meysydd galwedigaethol yn gwbl hanfodol.
- Rydyn ni hefyd yn croesawu'r ffaith eich bod yn sicrhau bod y Gymraeg yn rhan flaenllaw o'ch gwaith a'ch bod yn hyrwyddo defnydd o'r Gymraeg ymysg staff er mwyn ei gwreiddio o fewn y sefydliad.

- Mae cydweithio parhaus â rhanddeiliaid, gan gynnwys ysgolion a cholegau, yn allweddol i wireddu'r uchelgais, gan sicrhau bod yr asesiadau cyfrwng Cymraeg nid yn unig yn cael eu hyrwyddo'n effeithiol ond hefyd yn cael eu hannog.
- Bydd angen sicrhau bod Cymwysterau Cymru yn sicrhau bod y fframwaith yn cael ei ddefnyddio i gefnogi sefydliadau mewn ffordd ymarferol.

Cwestiynau'r ymgynghoriad

1. I ba raddau ydych chi'n cytuno â'r dull wedi ei amlinellu yn ein strategaeth Gymraeg cynigiedig?

Rydyn ni'n cytuno gyda'r amlinelliad. Mae strwythur pendant yn y pum colofn o fewn y fframwaith. Trwy'r disgwyliadau, ymgysylltiad gyda'r rhanddeiliaid ac ymgorffori'r Gymraeg yn eich gweithle – bydd hyn yn fodd i normaleiddio'r Gymraeg ar draws y sector addysg a chymwysterau.

2. I ba raddau yr ydych yn cytuno bod y strategaeth yn ddigon uchelgeisiol i gefnogi amcanion Bil y Gymraeg ac Addysg a ysgogwyr polisi eraill o ran y Gymraeg?

Mae'r strategaeth yn un uchelgeisiol. Mae'n adlewyrchu prif nod y Bil sef sicrhau bod pob dysgwr yn defnyddio Cymraeg annibynnol a'u bod yn datblygu sgiliau llafar sy'n cyfateb i o leiaf lefel B2 o'r CEFR. Mae llwyddiant hyn yn dibynnu ar lawer o ffactorau sef bod pob dysgwr yn cyrraedd lefel B2 yn y lle cyntaf a bod cynnydd mawr yn yr arlwy o gymwysterau Cymraeg i gefnogi dysgwyr gan gynnwys rhai galwedigaethol ôl-16 dwyieithog. Mae'n rhaid bod cyd-dynnu ar draws yn y sector addysg.

3. Pa dueddiadau ychwanegol sy'n effeithio ar addysg a chymdeithas ehangach ddylen ni eu hystyried?

Y datblygiad mwyaf trawsnewidiol yw deallusrwydd artiffisial. Mae'n arf sy'n gallu grymuso ac mae defnydd ohono yn cynyddu'n gyflym. Mae angen i Gymwysterau Cymru sicrhau bod y technolegau newydd hyn ar gael trwy gyfrwng y Gymraeg fel yn y Saesneg.

Recriwtio – mae Cymwysterau Cymru eisoes wedi nodi'r pwysigrwydd i ddal gafael ar aelodau staff sydd â sgiliau Cymraeg a chynyddu eu nifer erbyn 2030. Ond mae prinder o siaradwyr Cymraeg yn broblem ar draws y sector addysg gan gynnwys sicrhau'r dilyniant o ysgolion cyfrwng Cymraeg i ddarpariaeth ôl-16 er medru addysgu'r cymwysterau.

Niferoedd sy'n dewis y pynciau i'w hastudio trwy gyfrwng y Gymraeg (yn enwedig y pynciau galwedigaethol). Efallai ei bod yn syniad cyfeirio at yr adroddiad thematig ar y Coleg Cymraeg Cenedlaethol gafodd ei gyhoeddi gan Estyn ddiwedd Mawrth 2025. Yn fras, dengys y canfyddiadau fod y mentrau (e-ddysgu, Sgiliaith a Chymraeg Gwaith) wedi llwyddo i gynyddu nifer yr ymarferwyr sy'n siarad Cymraeg ac yn cofrestru eu gallu i weithio drwy'r iaith. Fodd bynnag, prin yw'r dystiolaeth i gysylltu'r hyfforddiant yn uniongyrchol â gwelliannau hirdymor mewn addysgu trwy gyfrwng y Gymraeg. Er bod mwy o weithgareddau dysgu bellach yn cynnwys 'ychydig bach o ddysgu cyfrwng Cymraeg,' ychydig o dwf a fu mewn addysgu dwyieithog lefel uwch a Chymraeg yn unig. Os oes niferoedd bach, mae llai o alw am gymwysterau a'r duedd i ddewis cyfrwng Saesneg yn fwy apelgar, hyd yn oed i ddisgyblion sydd wedi dod o ysgolion cyfrwng Cymraeg neu ddwyieithog a'u medrau yn y Gymraeg yn gadarn.

4. Gyda pha agwedd o'n gwaith allwch chi'n helpu fel partneriaid/ rhanddeiliaid, er mwyn ein cefnogi i gwblhau amcanion y strategaeth?

Gall Estyn gefnogi'r strategaeth drwy:-

*gyflwyno adroddiadau thematig ar argaeledd ac ansawdd y cymwysterau ac asesiadau cyfrwng Cymraeg

*ddarparu adborth o'r arolygiadau ac ymgysylltu â rhanddeiliaid, yn enwedig ysgolion a darparwyr ôl-16

*gydweithio er mwyn datblygu canllawiau a phrosesau gwerthuso er mwyn cefnogi datblygiad iaith a sicrhau mynediad i bob dysgwr.

5. Rydym wedi awgrymu strategaeth bum mlynedd 2025-2030, gydag adroddiadau blynyddol - a yw hyn yn synhwyrol yn eich barn chi?

Mae pum mlynedd yn gyfnod sy'n caniatáu amser i systemau newid a dwyn ffrwyth. Bydd yr adroddiadau blynyddol yn fodd i werthuso'r camau ac addasu fel bo angen yn ôl y canfyddiadau.

6. Sut gallwn ni fesur ein heffaith?

Rydyn ni'n argymhell y canlynol :

Craffu ar y niferoedd sy'n gwneud y cymwysterau Cymraeg a dwyieithog ar draws yr holl sectorau.

Tracio cynnydd dysgwyr o ran eu datblygiad yn y sgiliau llafar ar y fframwaith cyfeirio cyffredin Ewropeaidd ar gyfer ieithoedd (CEFR).

Craffu ar y nifer o gyrff dyfarnu sy'n cynnig cymwysterau yn y Gymraeg, gan ystyried cyd-destunau'r sefydliadau hynny.

Holi barn y canolfannau sy'n cynnig ac yn gweithredu'r cymwysterau hynny.

Gwneud defnydd o 'Llais y dysgwr'.

Tracio cynnydd y gweithlu o fewn Cymwysterau Cymru er mwyn gwerthuso defnydd a rhuglder y gweithwyr.

Adnabod astudiaethau achos neu adroddiadau thematig o arferion da.

7. Unrhyw sylwadau eraill?

Dyma strategaeth amserol. Rydym yn annog Cymwysterau Cymru i fod yn hyblyg ac yn gynhwysol wrth newid, yn enwedig wrth ymateb i anghenion dysgwyr. Mae angen cydweithio agos ar draws y gyfundrefn addysg er mwyn sicrhau llwyddiant yn y maes hwn.